



БҰҰ-мен БЕРІК БАЙЛАНЫС

Мемлекет басшысы Қасым-Жомарт Тоқаев БҰҰ делегациясымен – БҰҰ Бас хатшысының орынбасары – БҰҰ Азия және Тынық мұхиты үшін экономикалық және әлеуметтік комиссиясының Атқарушы хатшысы Армида Алисджабанмен, Бас хатшының саяси мәселелер жөніндегі көмекшісі Мирослав Енчимен және БҰҰ Бас хатшысының көмекшісі – БҰҰ Даму бағдарламасы әкімшісінің көмекшісі Ивана Живковичпен кездесу өткізді.

Кездесуге қатысушылар Қазақстан мен БҰҰ институттары арасындағы көпжақты ынтымақтастықты дамыту перспективаларын талқылады, сондай-ақ халықаралық және өңірлік күн тәртібіндегі өзекті мәселелер жөнінде пікір алмасты.

Президент Астана халықаралық форумына белсенді қатысқаны үшін дипломаттарға ризашылығын білдіріп, олардың БҰҰ аясындағы ұсыныстары форум жұмысының мазмұнын байытуға үлес қосқанын айтты.

Мемлекет басшысы БҰҰ-ның бейбітшілікті нығайту, қауіпсіздік пен жаһандық дамуды қамтамасыз ету ісіндегі айрықша рөліне назар аударды. Қасым-Жомарт Тоқаев БҰҰ Қауіпсіздік Кеңесін

жан-жақты реформа жүргізу қажеттігіне және осы органның өкілдігін кеңейтудің маңыздылығына тоқталды.

Президент осы әмбебап ұйымның рөлін нығайту мақсатында Қазақстан БҰҰ-мен күш біріктіруге ниетті екенін растады.

Қазақстанда БҰҰ-ның 20-дан астам бөлімшесі табысты жұмыс істеп жатыр. Осы ретте Алматы қаласында Орталық Азия мен Ауғанстан үшін Орнықты даму мақсаттары жөніндегі өңірлік орталық құру маңызды екені атап өтілді. Бұл орталықтың қызметі 2030 жылға дейінгі күн тәртібін ілгерілету үшін кешенді шаралар қабылдау арқылы БҰҰ агенттіктерінің өңірдегі елдер үкіметтерімен арадағы үйлесімділікті нығайтуға бағытталады.

Өз кезегінде жоғары лауазымды дипломаттар Астана халықаралық форумы туралы өздерінің әсерін ортаға салып, қазіргі заманның өзекті сын-қатерлерін шешу тәсілдерін әзірлеуде осы алаң стратегиялық тұрғыда маңызды екенін атап өтті.

Сондай-ақ кездесуде көлік-логистика әлеуеті мен цифрландыру процесі тұрғысынан Орталық Азияның стратегиялық рөліне назар аударылды.

Кездесу соңында Мемлекет басшысы БҰҰ Бас хатшысы Антониу Гутерришке жүрекжарды сәлемін жолдады.

ТИІМДІ ҰНТЫМАҚТАСТЫҚҚА ЖОЛ АШАДЫ



Ақордада Мемлекет басшысы Босния және Герцеговина Президиумының Төрағасымен кездесу өткізді. Қасым-Жомарт Тоқаев Желька Цвиновичке ілтипат білдіре отырып, Астана халықаралық форумының жұмысына белсенді қатысқаны үшін алғыс айтты.

Президент бұл сапар екі-жақты қарым-қатынастарды дамытуға және ауқымды мәселелер бойынша өзара тиімді ынтымақтастықты іске асыру үшін жақсы мүмкіндіктерге жол ашатынын атап өтті.

Мемлекет басшысы Босния және Герцеговинаны Оңтүстік-Шығыс Еуропа мен Балкан ай-

мағындағы перспективті сауда-экономикалық серіктес ретінде қарастыратынын айтты.

Өз кезегінде Желька Цвинович қонақжайлық көрсетіп, жылы қабылдағаны, сондай-ақ Астана халықаралық форумына шақырғаны үшін алғыс айтты. Бұдан бөлек, ол аталған форумды өткізудің маңыздылығын

атап өтіп, оның аясында халықаралық ынтымақтастық пен жаһандық экономиканың қазіргі жағдайына қатысты жаңа бастамалар айтылғанын жеткізді.

Тараптар сондай-ақ халықаралық және өңірлік күн тәртібіндегі өзекті мәселелер жөнінде пікір алмасты.

Өзара сенімге негізделген келіссөздер сындарлы және мазмұнды сипатта өтті. Келіссөздер нәтижесінде екіжақты ынтымақтастықты жандандыру бойынша уағдаластыққа қол жеткізілді.

АГРОСАЛАДАҒЫ СЕРІКТЕСТІККЕ СЕҢІМ АРТАДЫ



Мемлекет басшысы Ауыл шаруашылығы мәселелері жөніндегі Еурокомиссар Януш Войчеховскиймен кездесті.

Президент Қасым-Жомарт Тоқаев Януш Войчеховскийге Астана халықаралық форумына спикер ретінде қатысқаны үшін алғыс айтты.

– Біздің елімізбен айрықша байланысыңыз бар екенін біліп, таңғалдым. Қадірлі анаңыз Екінші дүниежүзілік соғыс жылдары Қазақстанда өмір сүріпті. Сондықтан сіздің сапарыңызға өте қуаныш-

тымыз. Елімізде поляк диаспорасы тұрады. Әрі біздің ортақ мәдени мұрамыз бар. Бенедикт Поляк, Адольф Янушкевич, Густав Зелинский, Александр Затаевич секілді тұлғалар Қазақстанның мәдени дамуына елеулі үлес қосты, – деді Мемлекет басшысы.

Кездесу барысында Қасым-Жомарт Тоқаев Қазақстанның ірі сауда серіктесі саналатын Еуропалық Одақпен ынтымақтастықтың стратегиялық сипатына назар аударды.

(Жалғасы 2-бетте)

НАҚТЫ ТАПСЫРМА БЕРДІ

Абай облысындағы алапат өртке байланысты Президент Төтенше жағдайлар министрі Юрий Ильинге оқиға орнына жедел барып, өрт сөндіру жұмыстарын басқару міндетін жүктеді.

Үкіметке және Абай облысының әкімдігіне қаза тапқан орман шаруашылығы қызметкерлерінің отбасыларына барлық қажет көмекті көрсету тапсырылды.

ТЖМ мәліметіне сәйкес, орман шаруашылығының үш қызметкері қаза тапты, тағы 11 қызметкер іздестіріліп жатыр.

ЖЫЛҚЫ ЖАЛЫНА ЖАРМАСЫП ӨСКЕН



Ат баптау, аттың құлағында ойнау қазақтың қанында бар қасиет. Ал Джигитовканы ат спортының осы түрімен айналысатын әуесқой жігіттер жігіттік өнер деп атап жүр. Сонымен бірге вальтижировка спортының жалғасы ретінде әлемдік спорт саласына енген қиын өнер саналатын Джигитовка соғыс жылдарынан қалған деген де нұсқау бар.

Соғыс кезінде ат үстінде әртүрлі іс-қимылдар жасалып, кейінірек сол қимылдар өңделіп, циркте көрсетілетін акробаттық әдіс-тәсілдерге ұласқан. Демек, ат спортының әскери-қолданбалы түріне жататын бұл өнер ат баптайтындардың да қолынан келе бермейді. Ең бастысы, аса мұқияттық пен ептілікті талап ететін бұл өнерде аса қатты жылдамдықпен шауып келе жатқан аттың үстіне секіріп мініп, секіріп түсіп, атты айналып, тіпті бір жағынан екінші жағына ауысу, төбесінде тұрып, жатып шабу сынды күрделі жаттығулар көрсетілді. «Бізге ат жақсылап, әлемі шауып берсе болды. Қалған үстіндегі жұмыстар өзіміздікі», дейді Шымкент циркінде Джигитовка көрсететін «Тұмар» командасының жігіттері.

14 >>

БАТЫС КИНОСЫНДАҒЫ «БАСҚА ҚАЗАҚСТАН»



Жуырда Netflix-те шыққан «Фубар» сериалы Қазнетте үлкен талқы тудырды. Сериалда басты рөлдегі Арнольд Шварценегер бастаған тәжірибелі команда Қазақстанға арнайы миссиямен аттанады. Сериалдың бірінде қаһармандар бағасы аспандап тұрған «қазақстандық» сағызды талқылап, қазақтардың бекон жемейтінінен хабардар екенін көрсетеді.

ҮЙДЕН ШЫҒЫП ОРАЛМАҒАН



Жаратылыс жұмбағында «тағдыр» деген бір тылсым бар. Адам баласы тағдыр төлкегіне, тағдыр жазуына шүбәсіз сенетіні тағы рас. Танысының, жақынының, не өзінің басынан қандай да бір қиындықтар өтіп жатса, «тағдырдың пешенеге жазуы да» деп болжамды байламын да жасайды. Бір сөзбен айтқанда, тағдыр адам өмірінде рөлі бар беймәлім бір құбылыс.



АГРОСАЛАДАҒЫ СЕРІКТЕСТІККЕ СЕНІМ АРТАДЫ

(Басы 1-бетте)

— Жақында Қырғызстанда «Орталық Азия — Еуропалық Одақ» жаңа форматында кездесу өткіздік. Бұған дейін Астанада бірінші кездесу болған. Сондықтан тығыз қарым-қатынас жасау жөніндегі ниетіміз бен ұмтылысымызды көрсету үшін жоғары деңгейдегі осындай кездесулерді өткізіп тұру керек. Биыл жыл басында Еуропалық Одақпен дипломатиялық қарым-қатынас орнатқанымызға 30 жыл толды. Еуропалық Одақпен өзара байланысымызды нығайтуға мол мүмкіндік бар, — деді Президент.

Қасым-Жомарт Тоқаев Еурокомиссарға Қазақстанда жүргізіліп жатқан реформалар, сондай-ақ демократияны дамытуға, адам құқықтарын қорғауға және қоғамда заң үстемдігін орнатуға септігін тигізетін өзгерістер туралы айтты.

Сонымен қатар Мемлекет басшысы Қазақстанның Еуропалық Одақпен ауыл шаруашылығы

саласындағы ынтымақтастықты кеңейту үшін зор әлеуеті бар екеніне тоқталды. Оның айтуынша, еліміз дәнді және майлы дақылдарды, сондай-ақ жоғары сапалы органикалық өнімдердің экспортын арттыруға дайын.

Өз кезегінде Януш Войцеховский құрмет көрсеткені үшін Президентке ризашылығын білдірді.

— Менің Қазақстанмен ерекше байланысым туралы айттыңыз. Иә, анам Екінші дүниежүзілік соғыс кезінде Қазақстанда алты жыл өмір сүрді. Анам сол қиын-қыстау шақта қазақ халқы оларға мейірімділік танытқанын үнемі айтып отыратын. Сондықтан менің Қазақстанға деген көңілім ерекше. Сізді Астана халықаралық форумын табысты өткізуіңізбен құттықтаймын. Сіздің сөйлеген сөзіңізді айрықша ықыласпен тыңдадым. Дұрыс айтасыз, бізге сын-қатерлерді анықтап, түйткілдерді шешу үшін ортақ диалог қажет. Жаһандық деңгейдегі қазіргі күрделі мәселенің бірі — азық-түлік қауіпсіздігі, — деді Еурокомиссар.

ҚАРЫМ-ҚАТЫНАСТЫҢ НЕГІЗГІ АСПЕКТІЛЕРІ СӨЗ БОЛДЫ



Мемлекет басшысы Total Energies компаниясы директорлар кеңесінің төрағасы және президенті Патрик Пуаннени қабылдады.

Кездесуде Total Energies компаниясының Қазақстанмен қарым-қатынасының негізгі аспек-

тілері және энергетика саласындағы ынтымақтастықты нығайту мәселелері талқыланды.

Сонымен қатар Total компаниясының мұнай-газ химиясы саласындағы инвестициялық жобаларға қатысу перспективасы қарастырылды.



ҚАРЖЫ НАРЫҒЫНДАҒЫ МӘСЕЛЕЛЕРДІ ТАЛҚЫЛАДЫ

Президент Астана халықаралық форумына қатысу үшін келген белгілі америкалық экономист, Нью-Йорк университетінің профессоры, Roubini Masco Associates консалтинг компаниясының директоры Нуриэль Рубиниді қабылдады.

Президент Астана халықаралық форумына қатысып, әлемдегі сын-қатерлер туралы өзінің ой-пікірін ортаға салғаны үшін Нуриэль Рубиниге ризашылығын білдірді.

Кездесуде жаһандық қаржы нарығындағы негізгі үрдістер талқыланды.

БІРЛЕСКЕН ЖОБАЛАРДЫ ТАНЫСТЫРДЫ

Мемлекет басшысы Sun Seven Stars Investment Group компаниясының тең төрағасы және Бас директоры У Чжэнді қабылдады.

Кездесу барысында қаржы саласындағы инвестициялық ынтымақтастық, цифрландыру және онлайн-сауда, сондай-ақ Астана халықаралық қаржы орталығымен өзара іс-әрекет мәселелері талқыланды.

Президентке жанартылатын энергия көздері саласындағы бірлескен инвестициялық жобаларды іске асыру жоспары туралы мәлімет берілді.

Сонымен қатар У Чжэн өз компаниясының АХКО базасында Көміртегінің жаһандық цифрлық сауда орталығын ашу жоспары туралы айтты.



ЖАҒАНДЫҚ СЫН-ҚАТЕРДІ ЖҰМЫЛА ЖЕҢЕМІЗ

Елордадағы Конгресс орталықта «Диалог арқылы сын-қатерлерді еңсеру: ынтымақтастық, өркендеу және прогресс жолында» тақырыбында Астана халықаралық форумы өтті. Екі күнге созылған жиынның алғашқы күні өткен пленарлық сессияға Президент Қасым-Жомарт Тоқаев қатысып, сөз сөйледі.

Нұрлан ҚОСАЙ

Дөңгелек үстел форматында өткен пленарлық сессияда жоғары мәртебелі делегаттар әлемдік экономикадағы, сауда және саясаттағы жаһандық үдерістерді талқылады. Сондай-ақ климаттың өзгеруі, азық-түлік тапшылығы және энергетикалық қауіпсіздік секілді түйткілдердің шешу жолдарын егжей-тегжейлі қарастырды.

Жиында Президент Қасым-Жомарт Тоқаевпен қатар Қырғыз Республикасының Президенті Садыр Жапаров, Босния және Герцеговина Президиумының төрағасы Желька Цвиянович, Өзбекстан Премьер-министрі Абдулла Арипов, ЮНЕСКО Бас директоры Одрэ Азуле, ХВК Басқарушы директоры Кристалина Георгиева, ЕКЫҰ Бас хатшысы Хельга Шмид және БҰҰ Бас хатшысының орынбасары — ЭСКАТО ұйымының атқарушы директоры Армида Салсиа Алисджабана сөз сөйледі. БҰҰ Бас хатшысы Антониу Гуттереш форум қатысушыларына видеондау жолдады. Пленарлық отырысты белгілі CNN журналисі Ричард Квест жүргізіп отырды.

Форум қатысушылары алдында сөз сөйлеген Мемлекет басшысы осы жиынға қатысу үшін елімізге арнайы келген Қатар Әміріне, Қырғыз Республикасының президентіне, Босния және Герцеговина Президиумының төрағасына, Өзбекстан Премьер-министріне ризашылығын білдірді.

Президент жаһандық экономиканың қазіргі жай-күйі мен өңірлік ынтымақтастық мәселелері жөнінде пікір алмасу үшін аталған форумның маңызы зор екенін атап өтті.

— Бұл — халықаралық серіктестіктің шынайы мән-маңызын айқындайтын жолдың бірі. Осы форумды бастай отырып, стратегиялық серіктесіміз — Біріккен Ұлттар Ұйымына және оның ХВК,

ЮНЕСКО, БҰҰДБ, ДСҰ, ЭСКАТО секілді ұйымдарына, басқа да халықаралық институттарға, сондай-ақ ақпараттық әріптесіміз CNN-ге шынайы ризашылығымызды білдіруге рұқсат етіңіздер, — деді Мемлекет басшысы.

Мемлекет басшысы бұрын-соңды болмаған геосаяси шиеленіс пен қазіргі заман өркениетінің сын-қатерлеріне назар аударып, Астана халықаралық форумы миссиясының бес негізгі міндетіне тоқталды. Атап айтқанда, әлемдегі жағдайды ашық талқылау; негізгі сын-қатерлер мен дағдарысты айқындау; осы сын-қатерлерге өзара ынтымақтастық рухында диалог арқылы қарсы тұру; көпжақты қатынастардың ортақ мәдениетін жаңарту және қалпына келтіру; бейбітшілікті, прогресс пен ынтымақты жақтайтын дауыстарды күшейту форумның негізгі миссияларының қатарына кіреді.

Сонымен қатар Президент Біріккен Ұлттар Ұйымы құрылған сәттен бері негізгі қаланың әлемдік тәртіпке төнетін қауіп-қатерлер туралы айтты. Бұл ретте Қасым-Жомарт Тоқаев БҰҰ бірден-бір жаһандық әмбебап ұйым болып қала беретінін әрі бұл ұйым барша адамзат баласының мүддесі мен шынайы мұқтажықтарына қызмет ететінін айрықша атап өтті. Президент өз сөзінде әлемдегі жаңа дағдарыстың ықпалына қатысты ой-пікірімен бөлісті.

— COVID-19-дан бастап қарулы қақтығыстарға дейінгі соңғы «жаңа дағдарыстар» нәзік халықаралық экожүйеге қауіп төндірді. Бірақ бұл тұрақсыздықтың түпкі себебі теренде жатыр. Сонымен қатар біз 30 жылдан кейін «блоктарға» бөлінетін ескі көзқарастарға қайта оралу жағдайына күе болып отырмыз. Тек геосаяси күш біздерді жікке бөліп жатқан жоқ. Оның экономикалық астары да бар. Экономикалық саясат қару ретінде ашық қолданылуда. Бұл қарама-қайшылықтар санкциялар мен сауда соғыстарын, максатты борышкерлік саясатты, қаржыландыру көздерінен шектеуді немесе жоюды, сондай-ақ инвест-



тицияны бақылауды камтиды, — деді Қасым-Жомарт Тоқаев.

Мемлекет басшысының айтуынша, геосаяси қиындықтарға қарамастан, Қазақстан сенімді сауда-экономикалық серіктес ретінде Орталық Азияның экономикалық локомотиві ролін атқарып отыр. Сөз соңында Қасым-Жомарт Тоқаев форум ортақ мәселелерді шешуге, сондай-ақ әріптестікті, даму мен прогресті ілгерілетуге өзүлесін қосатынына сенім білдіріп, жиынға қатысушыларға табыс тіледі.

Сонымен қатар жиында Қырғыз Республикасының президенті Садыр Жапаров, Босния және Герцеговина Президиумының төрағасы Желька Цвиянович, Өзбекстан Премьер-министрі Абдулла Арипов, ЮНЕСКО бас директоры Одрэ Азуле, Халықаралық валюта қорының басқарушы директоры Кристалина Георгиева және басқа да спикерлер сөз сөйледі.

Ұйымдастырушылар форум климаттың өзгеруіне, азық-түлік тапшылығына және энергетикалық қауіпсіздікке қатысты мә-

селелерді шешу жолдарын қарастыру мақсатында шетел үкіметтерінің, халықаралық ұйымдардың, бизнес пен ғылыми ортаның жоғары лауазымды делегаттарының диалогіне арналған алаң болмақ екеніне назар аудартып отыр. Оған 40-тан астам мемлекеттен 400-ге жуық делегат қатысты. Форумның екінші күні де пленарлық отырыстар жалғасын тапты. Сондай-ақ жалқыдан жалпыға: «жасыл экономикаға» көшуді қаржыландыру, көміртекті бейтараптықтың экономикалық және экологиялық салдары, өңірлерде жанартылатын энергия көздерін дамыту сынды бірқатар сессия өткізілді. Онда отандық және шетелдік ғалымдар мен сарапшылар өзекті мәселелерді талқыға салды. Панельдік сессиялардан бөлек брифингтер, құжаттарға қол қою және кездесулер өтті.

Мәселен, форумның екінші күні жұмысы «Энергетикалық қауіпсіздікті қайта қарау: айқын шешімдердің шеңберінен шығу қажеттілігі» тақырыбындағы панельдік сессиямен басталды. Бұл — пікірталас

аланындағы басты тақырыптардың бірі. Оған сараптамалық қоғамдастықтың, Қазақстан Энергетика министрлігінің және халықаралық энергетикалық компаниялардың өкілдері қатысты. Сонымен қатар «Өзгелердің шарасыздығы кезінде әрекет ету: қиын сәттердегі «орта державалардың» дипломатиясы»; «Цифрландыру және жасанды интеллект: әсері мен салдары»; «Әлеуметтік толқулар: жалған ақпарат және алгоритмдердің күші» және басқа да тақырыптарға талқылаулар ұйымдастырылды.

Іс-шара геосаяси шиеленістің күшеюіне және мемлекетаралық ынтымақтастықтың дәстүрлі модельдерінің түбегейлі өзгеруіне байланысты бұрын-соңды болмаған сын-қатерлерге қатысты жауаптар іздеу үшін әлемдік қоғамдастықтың күш-жігерін біріктіруге арналған. Форум аясында аталған бағыттар бойынша 40-тан астам панельдік сессия, бейресми пікірталастар және басқа да бағдарламадан тыс іс-шаралар өткізілді.



ҚАУІПСІЗ ӘЛЕМ ҚҰРУДЫҢ ҚАДАМДАРЫ

Сенат Төрағасы Мәулен Әшімбаев Астана халықаралық форумы алаңында сөз сөйлеп, әлемдік тәртіптің парадигмасы өзгерген кезеңдегі «орта» мемлекеттердің рөлі жөнінде баяндама жасады.

Палата Спикері өз сөзінде Форум негізгі жаһандық мәселелерді бірлесіп шешу үшін халықаралық қоғамдастықты ортақ мақсатқа жұмылдыруды көздейтінін атап өтті. Сондай-ақ ол дипломатия мен халықаралық құқық жүйелерінің әлсіреуіне байланысты әлемдік диалогтың жаңа форматының өзектілігі артып отырғанын айтты.

«Бұл жағдайда орта мемлекеттердің рөлін қайта қарастыру керек. Тендік, диалог, инклюзия, мемлекеттердің аумақтық тұтастығын құрметтеу қағидаттарына негізделген халықаралық ынтымақтастықтың жаңа парадигмасы қажет. Мұндай жаңа жағдайда орта елдер негізгі рөлдердің бірін атқаруға тиіс. Тек ірі державалардың қарым-қатынасы төңірегінде қалыптасқан халықаралық жүйеден арылудың маңызы зор. Қазіргі таңда желілік принцип бойынша құрылған институттар тиімді. Осы тәжірибені халықаралық институттарға да енгізуге болады», — деді Мәулен Әшімбаев.

Сондай-ақ Сенат Төрағасы халықаралық деңгейде диалог және инклюзивті даму мәдениетін дәріптеудің перспективалық бағыттарына назар аударды. Сол арқылы белсенді орта мемлекеттер үшін өз мүмкіндіктерін іске асыруына жол ашылады.

«Біріншіден, бітімгершілік бастамаларды дәріптеу және мұқтаж елдерге немесе белгілі бір

әлеуметтік топтарға гуманитарлық көмек көрсету. Екіншіден, негізгі халықаралық институттардан тыс жағдайда ынтымақтастық пен өзара іс-қимылды нығайту. Үшіншіден, бүгінде барлық ел бетпе-бет келіп отырған өзекті экологиялық, әлеуметтік, гуманитарлық және өзге де проблемаларды талқылауға бастамашылық жасау. Сонымен бірге ресурстарды ғылыми зерттеулерге, адамзаттың болашағы үшін маңызды салалардағы жобаларға бағыттаудың мәні зор. Оның ішінде медицина, биохимия, жасыл технология және тағы басқа бағыттарды атап өтуге болады», — деген Мәулен Әшімбаев Астана халықаралық форумының қызметін мысалға келтірді.

Сенат Спикері жаһандық деңгейде мәдениеттер мен өркениеттер арасында алтын көпір болатын тағы бір тиімді бастама ретінде Әлемдік және дәстүрлі діндер лидерлерінің Съезін айтты.

«Бүгінде Қазақстан рухани дипломатияның мойындалған халықаралық орталықтарының бірі ретінде қалыптасты. Президентіміз Қасым-Жомарт Кемелұлы Тоқаевтың бастамасымен дін лидерлерінің идеяларын, ұсыныстары мен уағдаластықтарын дәріптеу үшін әлемнің рухани орталықтарында дөңгелек үстелдер өткізу қолға алынды. Қазақстанның бастамалары әлемдегі маңызды проблемаларды шешу кезіндегі орта елдердің мүмкіндіктерін көрсетеді. Мұндай қадам дамыған, тұрақты, инклюзивті және қауіпсіз әлем құруымызға ықпал ететіні анық», — дей келе, Мәулен Әшімбаев Қазақстан халықаралық қақтығыстарды дипломатиялық жолмен реттеуді қолдайтынын тілге тиек етті.

ЖАЛҒАН ТАУАР АЙНАЛЫМЫНЫҢ ЖОЛЫН КЕСЕДІ

Сенат Төрағасы Мәулен Әшімбаев Палата отырысында депутаттарға жаңа сенаторды таныстырды. Сондай-ақ отырыс кезінде «ТМД-ға қатысушы мемлекеттердің жалған тауар белгілерін және географиялық көрсеткіштерді пайдаланудың алдын алу мен жолын кесу жөніндегі ынтымақтастығы туралы келісімді ратификациялау туралы» заң қаралып, мақұлданды.



Отырысты ашқан Мәулен Әшімбаев өріптестеріне Солтүстік Қазақстан облысынан сайланған жаңа сенатор Әсем Рахметованы таныстырып, оған жаңа жұмыста сәттілік тіледі. Конституциялық нормаға сәйкес Әсем Рахметова ант берді, сондай-ақ, Әлеуметтік-мәдени даму және ғылым тұрақты комитетінің мүшесі болып сайланды.

Сонымен қатар Палата отырысында сенаторлар «ТМД-ға қатысушы мемлекеттердің жалған тауар белгілерін және географиялық көрсеткіштерді пайдаланудың алдын алу мен жолын кесу жөніндегі ынтымақтастығы туралы келісімді ратификациялау туралы» заңды қарап, мақұлдады. Бұл Келісім ТМД-ға мүше елдердің мемлекеттік шекаралары арқылы мұндай тауарлардың тасымалдануына жол бермеу жөніндегі шартты қамтамасыз етеді.

«Мақұлданған заң ТМД шеңберінде жалған тауар белгілері мен географиялық көрсеткіштерді пайдаланудың алдын алу және жолын кесу үшін қажетті құқықтық орта қалыптастырады. Сол үшін келісім арқылы мемлекеттер тарапынан қабылданатын бірлескен іс-шаралар мен құқықтық тетіктер айқындалады. Алдағы уақытта келісім қатысушы мемлекеттердің зияткерлік меншік

құқықтарын қорғау саласындағы әлеуетін арттыруға он үлесін қосады деп сенеміз», — деді Мәулен Әшімбаев.

Бұдан басқа, Сенат отырысында Қазақстан Республикасының орнықты дамуы саласындағы ұлттық мақсаттар мен міндеттердің іске асырылуын мониторингтеу жөніндегі Парламенттік комиссияның құрамына Қазақстан Республикасы Парламенті Сенатының депутаттарын сайлау туралы мәселе қаралды. Комиссия құрамына әр Палатадан 9 депутаттан мүше болады.

«Мемлекет басшысы Қасым-Жомарт Кемелұлы Тоқаевтың тапсырмасы бойынша Парламентте Орнықты даму саласындағы ұлттық мақсаттар мен міндеттердің іске асырылуына мониторинг жүргізетін парламенттік комиссия құру жұмыстары қолға алынды. Бұл комиссияның негізгі мақсаты — Президентіміздің реформалары аясында Орнықты даму саласындағы ұлттық мақсаттар мен міндеттерді тиімді іске асыруға жәрдемдесу. Оның жұмысына Үкімет мүшелері, халықаралық ұйымдар мен қоғамдық ұйымдардың, үкіметтік емес сектордың өкілдері және сарапшылар мен ғалымдар қатысып отырады», — деді Сенат Спикері.

ҰЛТТЫҚ ҚОРДАН «БАЗАРЛЫҚ» ҚАЛАЙ БЕРІЛЕДІ?

Палата Спикері Ерлан Қошановтың төрағалығымен Мәжіліс Бюросының отырысы өтті. Онда алдағы жалпы отырыстың күн тәртібінің жобасы нақтыланды.



Депутаттардың талқылауына бірінші оқылымда Қазақстан Республикасының Ұлттық қорын балаларға төлем жасау мәселелері бойынша заңнамалық түзетулер ұсынылады.

Бұл заң жобасын Парламент депутаттары Мемлекет басшысының 2024 жылғы 1 қаңтардан бастап «Ұлттық қор – балаларға» жобасын іске асыру жөніндегі тапсырмасын орындау мақсатында әзірледі.

Алдағы жалпы отырыста «Кәсіптік біліктілік туралы» және оған ілесіп заң жобасы екінші оқылымда қаралатын болады.

Сонымен қатар депутаттар орман шаруашылығы және ерекше қорғалатын табиғи аумақтарға қатысты, сондай-ақ ҰҚШҰ Жарғысына өзгерістер енгізуге тәртіпінші хаттаманы ратификациялауға байланысты заң жобалары бойынша қорытынды әзірлеу мерзімін айқындайды.

МЕРДІГЕРЛЕР ЖАУАПКЕРШІЛІККЕ ТАРТЫЛАДЫ



Алматы әкімдігі Түркісіб ауданының аумағында сумен жабдықтау желілерінің құрылысы мен абаттандыруды сапасыз жүргізген мердігерлердің үстінен арыз түсірді.

Әкімдіктің баспасөз қызметінің хабарлауынша, белгіленген кестеден қалып қойған мердігерлер заң алдында жауап береді. Алматы әкімі Ерболат Досаевтың тапсырмасы бойынша көпқабатты

«Жас Қанат» тұрғын үй кешенінің құрылысына жауапты – Nadid және «Промкомплект» Б компанияларына қатысты іс сотта қаралып жатыр. Сонымен қатар тұрғын үй кешенінің айналасын абаттандыруды өз мойнына алған «СК ШАХ» ЖШС-ға қатысты талап-арыз дайындалуда. Әкімдік атқарылмаған жұмыстардың өтемін қайтаруды және оларды мемлекеттік сатып алу мерзімін бұзғаны үшін жауапкершілікке тартуды талап етіп отыр.

ПОЛИЦЕЙ ЖАЯУ ЖҮРГІНШІНІ ҚАҒЫП КЕТТІ

Жамбыл облысы Тұрар Рысқұлов ауданының Луговой стансасында полицей қызметтік көлігімен жаяу жүргінші жолында қыз баланы қағып кетті. Аталған іс бойынша қызметтік тергеу жүріп жатыр.

«Жаяу жүргіншінің сот-медициналық сараптамадан өтуден бас тартуына байланысты полиция

қызметкеріне қатысты «Жаяу жүргіншілердің немесе жол жүрісінің өзге де қатысушыларының жүруіне басымдық бермеу», яғни, Әкімшілік құқық бұзу туралы кодекстің 600-бабының 1-бөлігі бойынша іс қозғалды. Аталған бап 10 айлық есептік көрсеткіш немесе 34 500 тенге көлемінде айыппұл салуды көздейді», — деп хабарлады облыстық Полиция департаментінің баспасөз қызметі.



Қарағанды облысында жас экобелсенділер әйнек пен пластик қалдығын жинап, сұрыптап, оны өңдеп, кәдеге жарайтын бұйым жасауды қолға алған. Толық циклді жобамен Е.Бөкетов атындағы Қарағанды университетінің экономика және халықаралық бизнес кафедрасы меңгерушісі Жәнібек Жартай жетекшілік ететін студенттер командасы үш жылдан бері айналысып келеді. Экологиялық стартап Enactus Kazakhstan National EXPO 2023 студенттік кәсіпкерлік, стартаптар және инновациялар жөніндегі Ұлттық кубогының бірінші орнын иемденіп, Қазақстан атынан Әлемдік кубокке жолдама алған болатын. Осы жоба төңірегінде Жәнібек Жартаймен пікірлесіп, оның көздеген мақсаттары жөнінде білген едік.

— Жәнібек Маратұлы ONDE деген нәтижелі жобаны жүргізіп келеді екенсіз. Осы әйнек пен пластик қалдықтарын өңдеу бойынша жоба қашан дүниеге келді? Қазір қай деңгейде жұмыс істеп жатыр, оған кімдер атсалысуда?

— Жоба басында 2019 жылы пластик бөтелкелерді жинап қоқыс өңдеушіге тапсыру жөніндегі экологиялық бастама ретінде пайда болды. Одан кейін 2020 жылы жобаны тоқтатқан едік. Өйткені пандемия басталды, қаржыландыру тоқтады. Кейін карантин аяқталған тұста қалдықтардың бұрынғыдан да еселеп көбейіп кеткенін көрдік. Деректерге жүгінсек, жыл сайын әрбір қазақстандық орташа алғанда 244 келі тұрмыстық қалдықты тастайды екен. Сосын жобамызды қайта жандандыру жөнінде шешім қабылдадық. 2020 жылдан бастап жобаны қолға алған жастарымыз қалдықты жинаумен ғана айналыспай, оны кәдеге жарату әрі имидждік өнім шығаруға бел байлайды. Қазір жобамыз үш бағытта жұмыс істейді. Экокозғалысты білім бағдарламалары арқылы насихаттау, жобаға халықтың әлеуметтік осал санатындағы жандарды көбірек тарту, қатты тұрмыстық қалдықты өңдеу.

Екі жылға жуық уақыттың ішінде университеттің гранттар байқауына қатысып, одан кейін басқа облыстық стартап конкурстарға қатысып жүзде-лерге ие болдық. Экологиялық стартабымыз Студенттік кәсіпкерліктің Ұлттық кубогында бірінші орын алып, миллион тенге грант ұтып алды. Осындай гранттық қаржыны жинастырып, пластикті өңдейтін үлкен құрал-жабдық сатып алдық. Құрал-жабдықпен қазіргі уақытта 600 мыңға жуық пластик бөтелкені жинап, өңдедік. Бірнеше өнім шығарған болатынбыз. Ол имидждік өнімдер. Стакан қоятын құты, қаламсап, кішігірім сағаттар, ойыншықтар шығара бастадық. 2022 жылдың аяғында тек пластик қана емес, әйнек қалдығымен жұмыс жасауды қолға алдық. Алдымен



ҚОҚЫСТАН ДА



әйнек қалдықты өңдеу және кәдеге жарату технологиясының тетіктерін игеруді бастадық. Биылдан бастап әйнектерден шамдарды, қаламсаптарды қоятын органайзерлер, үстелдің үстіне қойылатын шыныдан жасалған имидждік құрылғыларды шығардық. 3-4 жылдық жұмыс тәжірибесінің нәтижесінде студенттеріміз ұлттық стартапта жетістікке жетті. Қазір бұл жобамен — экономика, математика және ақпараттық технологиялар факультеті, биология және география факультеттерінің студенттері айналысып жатыр. Команданың ішінде 15 студент бар.

— Істің басы-қасында жүрген студенттер қандай нәрсені үйренеді?

— Басында бұл жоба экологиялық бастама ретінде қолға алынды ғой. Соның арқасында жастар жұмысты аса қызығушылықпен жүзеге асырды. Тағы бір ұғатын тұсы, студент өзінің университетте алып жатқан білімдеріне қосымша дағдыларды үйренуде. Яғни өңделетін пластикпен, әйнек қалдығымен жұмыс істеуді, одан қандай өнім алуға болатынын меңгеріп шығады.



Сонымен қатар бастамаларымыздың әлеуметтік бағыттағы маңызы бар. Осы дағдыны меңгеріп шыққан студенттер әлеуметтік осал топтағы көпбалалы отбасылар мүшелері немесе мүгедек жандарға білетіндерін үйретеді. Имидждік өнімдерді өздері жасап саудалайды, сол арқылы қосымша қаржы көздерін табады.

— JIHAZ деген жобаны да жүзеге асырып жатыр екенсіздер. Бұл жобаның

АҚША

мақсаты мен нәтижелері туралы айтып өтсеңіз.

— Бұл да жанағы жобамен сабақтас. 2021 жылдан бастап жүзеге асырылып келеді. Ең негізгі мақсаты — жанағы құрылыс паллеттерін белгілі бір өңдеуден өткізіп, жиһазға айналдыру. Бірінші экологиялық мақсатты көздейміз. Статистикаға жүгінсек, әлемде жыл сайын 200 мың шаршы шақырым орман жойылады екен. Соның салдарынан жабайы аңдар, флора мен фауна жойылып, табиғатқа тарайтын оттегі азайып кетеді. Орманның оталуына ағаштың тұрмыста қолданылуы себепші. Әрине, біз бүкіл ресурстан толық бас тарта алмаймыз. Алайда ағашты қайта қолдану арқылы орманның белгілі бір бөлшегін сақтап қалуға септігіміз тиіс. Қазір адамзатты климаттың өзгеруі, жаһандық жылыну проблемасы да алаңдатып отыр. Сол үшін өсіп тұрған ағаштарды барынша сақтауымыз қажет.



Жобаның мақсаты — жаңа жиһазға қажетті ағаш кесудің орнына қалдық саналып, қоқыста қалатын немесе отқа жағылатын паллеттерден жиһаз әзірлеу.

Екіншісі — әлеуметтік бағыттағы жоба. Құрылыс қалдығы саналатын паллеттерді кәдеге жаратып, жиһаз жасау. Алдымен студенттер өздері кәсіпкерлік негіздерін және бизнесін жүргізудің бастапқы дағдыларын үйреніп шығады. Кейін осы тәжірибелерін көпбалалы отбасының балалары, жетім балалар, мүгедектер және ерекше қажеттілігі бар жастарға үйретеді. Яғни қоғамның әлеуметтік осал саналатын санаты осындай өнім жасап, табыс тауып, өздерін қамтамасыз етуге қол жеткізуі тиіс. Осы жоба бойынша Қарағандыдағы үлкен компаниямен серіктес болдық. Олар бізге паллеттерді тегін береді. Ал біз қамқорлық жасайтын

ТАБУҒА БОЛАДЫ



жандар, тегін шикізаттан өнім жасап, оны сатып табыс табады.

— Жастардың кәсіпкерлігі жөнінде көбірек айтғыңыз. Ал олардың өз кәсібін ашуына қолдау көрсету, біліктілікті үйретуді қолға алыңыздар ма?

— Командамыз Enactus Karaganda Buketov University аталады. Университетіміздегі «Жастар кәсіпкерлігі» орталығымен бірге жұмыс істейді. Одан бөлек 3 бағыттағы өз жобаларымызды алып жүреді. Ең бірінші бағыт — бұл коммерциялық жобалар. Әрбір студентті университет қабырғасынан бастап қалай жұмыс істеу керек екенін, одан кейін өздерінің белгілі бір дағдылары болса, оны қалай коммерцияландыруға болатынын үйретеміз. Қазіргі коммерциялық бағыттағы екі жобамызбен студенттеріміз айналысады. Олар тапсырыстар қабылдап, оны орындап, өздеріне табыс табады. Сонымен қатар осы жүргізілген жобаларды студенттеріміз дипломдық жұмысы ретінде қорғай алады. Сол жобаны немесе идеясын өзі оқу бітіргеннен кейін жеке кәсіпкер ретінде тіркеліп, бизнеске


айналдырып жалғастыра беруіне болады. Ондай мысалдар бізде көп. 10 шақты оқу бітірген түлегіміз студент кезінде жасаған жобасын дамытып, кәсіпке айналдырып алды.

— Сіз тоқталған жобала жүргендер ЖОО-ның белсенді студенттері. Енді ауыл жастарына келсек, оларға қолдау көрсетесіздер ме?

— Біз ауыл жастарына бизнес негіздеріне және кәсіпті қалай бастау, дамыту жөнінде көмек көрсетуге әзірміз. Университетте бизнеске бағытталған мамандықтар көп, айталық кәсіпкерлік және жобаларды басқару, бизнес, аналитика және бизнес консалтинг сияқты. Ауыл жастары 4 жыл оқып, одан кейін осы бағыттағы жобаларды бастап әрі қарай өзінің бизнесін алып кетуіне мүмкіндік бар. Сонымен қатар университетімізде «Жастар кәсіпкерлігі» орталығы бар. Онда студенттер ғана емес, ауыл жастары да біліктілігін шыңдай алады. Жаңа идеялар, дайын жобалар болса бизнес инкубациядан өткізіп, әрі қарай толыққанды өмір сүретін жобаға айналуына көмектесіп, нарыққа шығарамыз. Мұның барлығы тегін жүргізіледі. «Атамекен» ұлттық кәсіпкерлер палатасынан сертификат алған үйретуші сарапшыларымыз тегін түрде консультация бере алады. Егер бізді ауылдарына шақыртса, қызығушылық танытса, сол ауылдарға барып командадағы студенттеріміз өз тәжірибесімен алмасып, үйретуге дайын. Егер белсенділер команда қатарына қосыламын десе бизнес жобаларда студенттермен бірге тәжірибе жинақтаймын десе, есігіміз ашық. Қолдау көрсетеміз. Айта кетерлігі,



Жуырда Netflix-те шыққан «Фубар» сериалы Қазнетте үлкен талқы тудырды. Сериалда басты рөлдегі Арнольд Шварценеггер бастаған тәжірибелі команда Қазақстанға арнайы миссиямен аттанады. Сериялардың бірінде қаһармандар бағасы аспандап тұрған «қазақстандық» сағызды талқылап, қазақтардың бекон жемейтінінен хабардар екенін көрсетеді. Әлбетте, отандық көрерменнің көбі бұл қиял-ғажайып эпизодтарға езу тарта қарағаны рас. Өйткенмен, батыстық кино мамандарының біздің елді сценарийге қосарда қандай қисынға сүйенері сол күйі түсініксіз қалды.



БАҚЫТҚА КЕНЕЛГЕН ОТБАСЫ

Хайуанаттар бағын сатып алып, өмірдің мәніне ие болған отбасы жайлы әдемі хикаяны көргілеріңіз келе ме?

«Біз зообак сатып алдық» атты фильмнің түсірілуіне арқау болған оқиға өте әсерлі шыққан. Фильмнің басты кейіпкері – журналист Бенджамин Ми. Әйелі дүние салған соң оның басынан проблемалар арғылар емес: 14 жастағы ұлының мектептен шығып кетуі, жұмыстағы сәтсіздіктер, мазасыз көршілер – осының барлығынан құтылу үшін Бенджамин қоныс ауыстыруды шешеді.

7 жасар қызы Рози мен жанадан жұмысқа кірген риэлтор Стивенспен олар бірнеше үйді қарағанмен, көңіліне жайлысын таппайды. Соңында кішкентай қыз Рози ұсынған кітапшаладағы үй олар үшін тамаша шешім болып көрінеді. Олар ескі үйге барады: Бенджамин мүлкті тексеріп, риэлторға үйдің көңілінен шыққанын айтады. Арыстанның ақырған дауысы естілген кезде, Стивенс үйде бірнеше жыл бұрын жабылған хайуанаттар бағы болғанын, үйді алғысы келсе, екеуін қоса сатып алу керектігін айтып түсіндіреді. Үй құстарымен ойнап жүрген Розидің қуанышын көрген Бенджамин үйді хайуанаттар бағымен бірге сатып алуға келіседі.

Осылайша, хайуанаттар бағының қызметкерлері бұл орынды жұртшылыққа қайта ашу ниетімен, жөндеу жұмыстарына кіріседі.

Ауылшаруашылық ісінің катал инспекторы Уолтер Феррис аяқ астынан тексеріс жүргізіп, 150 мың доллар тұратын жөндеу жұмысының сметасын жасайды, ал Бенджаминде мұндай

БАТЫС КИНОСЫНДАҒЫ «БАСҚА ҚАЗАҚСТАН»

Ботагөз МАРАТҚЫЗЫ

Сол күйі дейтініміз – бұған дейін де жарыққа шыққан Голливуд фильмдеріндегі Қазақстан жайлы мәлімет ақиқатпен оншалықты, тіпті көбіне-көп мүлдем сәйкеспейді...

«ҚАЗАҚТАР БЕКОН ЖЕМЕЙДІ»

«Фубар» сериалында көрерменнің көзіне Қазақстан азаматының төлқұжаты оттай басылып, құлағына Сүлеймен Демирел университетінің атауы ып-ыстық естіледі. Иә, кейіпкерлер әңгіме қылып отырған Анна Фетисова атты «казак» студенті осы оқу орнында оқитын болып шығады. Жергілікті ұлтқа неліктен славян есімін тегілері келгені бізге белгісіз. Жалпы, белгісіз дүние мұнда көп. Мәселен, олар қай бір жылдары Қазақстанда аса танымал болған «Жарқын күлкі» деп аталатын сағызды талқылайды: кейіннен қызылмыяның тапшылығынан әлгі сағыздың бағасы аспандап кетіп, шенеуліктерге ғана қолжетімді затқа айналып-ты-мыс. Бізді тағы бір таңғалдырғаны – қолданыста жоқ қазақша сөздер еді. Агенттің серіктесі құлаққа түрпідей тиетін акцентпен «Неге көңілісіңіз, суперханым?» деп қазақша сөйлегенінде, көрерменнің кейбірі шайына шашалып та қалған шығар. Бірақ сценарист біздің доңыз етін жемейтінімізді білетіні қуантты: жолаушы жігіттің бекон жеп отырғанына қарап, шпиондар оның казак болып шығуы екіталай деген тоқтамға келеді. Әрине, бұл жерде нысанадағы әлгі адамның нәсілі азиатқа үш қайнаса сорпасы қосылмайтынымен олардың шаруасы болмады.

ҚАЛА АТАУЫНА ДА ҚАТТЫ БАС ҚАТЫРМАҒАН

2008 жылы жарыққа шыққан «Біздің дәуірімізге дейінгі Вавилон» фильміндегі Қазақстанның да шынайы Қазақстанмен ұқсастығы тым аз. Онда кейіпкерге Аврора есімді жұмбақ қызды Моңғолиядан Нью-Йоркке алып келу тапсырылады, қауіпке толы жол «казакстандық» Троицк қаласы арқылы өтеді. Фильм авторларының неліктен қаланы орыс-

ша атағысы келгені беймәлім. Шамасы, бізді де славян тектес ұлт деп ойласа керек, өйткені кадрға көбіне славян кейіпті адамдар түскен. Владивостокқа бара жатқан пойызда балалары мен ешкілерін алып келе жатқан азиат отбасы кездеседі, алайда олар қазақша сөйлемейді.

Фильмде 2027 жылдағы біздің мемлекет оншалықты бақуатты ел болып көрсетілмейді. Радиациядан әбден уланған, жартылай қираған қалалардың алаңдарында тот басқан кенестік бронетехника тұр, азып-тозған халықтың жерге асы, ішерге суы жоқ. Мұнда тек қылмыскерлер ғана шат-шадыман өмір сүреді. Тар өткелдердегі жайма базарлар арзанқол киім-кешекпен қатар клондалған экзотикалық жануарларды да, сондай-ақ өлген иттерді де сатып алуға болады.

Фильм оптимистік нотада аяқталады: монах әйел ақыр соңында Шығысты кедейліктен, Қазақстанды экологиялық апаттан құтқаруға бел буады.

«БОРАТТЫҢ» БІР НҰСҚАСЫ

Біз «Боратқа» бұлқан-талқан болып жүрсек, соның ар жақ-бер жағындағы басқа фильмдерді білмейді екенбіз. 2014 жылғы Megacities фильмінің сюжеті, сценаристің фантазиясы еріксіз баяғы «Боратты» еске түсіреді: мұндағы «Қазақстан» – тау мен шөлі араласып жатқан, үйлері батпақ пен ағаштан соғылған, түрі еуропалық адамдар тұратын, әйелдері құлдықта өмір сүретін, жезөкшелік пен нашакорлық жайлаған ит байласа тұрғысыз жер.

Сюжет бойынша, Қазақстанға келген АҚШ президентінің қызын жергілікті қылмыстық топ ұрлап кетеді. Бандиттерді бастаған бұзық қыздың есімі – Ульрика. Иә, фильм мамандары тағы да ат тандауда онбай қателескен.

Кинода көніл күйінді түсіріп, зығырданынды қайнататын тағы бір тұс бар. Америкалық шпион қыздарға казак әйелдеріне ұқсау үшін жергілікті азамат бастарын қой иісі сінген көне орамалмен бүркеуге кенес береді.

КИЮБІ КЕТКЕН КИСЫН СЫЗЖЕТ

The X-Files сериалының бесінші маусымындағы он үшінші эпизодта Қазақстанға



ұшатын тәрелке құлайды. Малдер мен Скалли есімді агенттер зерттеу жүргізіп, казакстандық бала Дмитрийдің әлгі ұшатын тәрелкенің қалай құлағанын көргенін анықтайды. Енді Дмитрий қандай да бір дертке шалдығады. Оның вируспен зақымданған көзі мен мұрнынан... мұнай ағады. Қатыгез агент Алекс Крайчик Дмитрийді АҚШ-қа алып келеді, бірақ бала белгісіз себептермен ғайып болады. Бұл серианы көрермен сериалдың ең қорқынышты бөлімі деп біледі. Сонымен қоса, ең қисынсыз да шығар...

КӨК ТҮ КӨЗІНЕ ЖЫЛЫ УШЫРАЙДЫ

Батыс фильмдерінің кейбірінде Қазақстан атауы бейтарап немесе позитив тұрғыда да көрініс тауып жатады. 2016 жылғы Preacher сериалының 8-сериясында періштелер шағын техастық турагенттікке кіргенінде, қабырғаға ілінген қызылды-жасылды плакаттардың арасында «Kazakhstan!» деген үлкен жазуы бар баннерді көруге болады. Чехословакияның, Гавай аралдарының суреттері қатарында Шым-бұлақ курорттыңдағы шаңғышының суреті де тұр. Сериал сюжеті 1995 жылы болып жатқанын ескерсек, расымен де уақыт шекарасы бұзылмаған екен: Қазақстан бұл кезде тәуелсіздігін алып үлгерген болатын.

«Крид: Рокки мұрасы» фильмінің ең басында басты кейіпкер рингке шыққанда, АҚШ туының жанында ілулі тұрған Қазақстан байрағын көресіз. Бұл жағдайда фильм авторы дәл біздің туға акцентті бекер түсірмесе керек: еліміздің әлемдік бокс сахнасындағы орны ерекше екені рас. «Эверест» фильмінде де біздің көк ту көзге тым жылы ұшырайды. Айтпақшы, бұл фильм шынайы оқиғаға негізделгенін айта кетейік: экспедиция қатысушыларының бірі танымал отандық альпинист Анатолий Букреев еді.



ақша жоқ. Хайуанаттар бағының есепшісі Ронда Блэрдің «Бенджамин осы жерді сатады» деген өсетін естіген қызметкерлердің көңіл күйі түсіп кетеді.

Осы қарбалас шақта Бенджамин әйелінің бұған жазып қалдырған инвестициялық шотын тауып алады. Бенджамин сол ақшаны хайуанаттар бағының жөндеу жұмысына жаратуы шешеді.

Режиссер Кэмерон Кроудың мақсаты сәтті орындалған. Екі сағаттық фильмге көп мағына сыйдыра алған: онда әке мен бала, әйел мен ер, адамдар мен жануарлар арасындағы қамқорлық, махаббат тамаша жолмен көрініс табады. Кино көрерменге біздің өміріміздегі ең маңызды нәрсе не және айналамызды бақытты ету үшін не істей алатынымыз туралы ойлануға көмектеседі. Фильм хэппи эндпен аяқталады.

«Біз зообак сатып алдық» – мен көрген фильмдердің ішіндегі ең жақсыларының бірі. Өте шынайы, қызықты әрі көңілді бұл фильмді басында басқа комедиялық туындылардың бірі болар деп ойладым. Сөйтсем, қателесіппін. Фильм өзінен кейін өте жарқын әсер қалдырды. Қазір көптеген фильмде кездесетін ерсі әзілдердің жоқтығы да қуантты. Кейіпкерлермен бірге қуанып та, жылап та алдым.

Аяжан ИСИНА,
Л. Гумилев атындағы Еуразия ұлттық
университетінің 1-курс студенті





Ат баптау, аттың құлағында ойнау қазақтың қанында бар қасиет. Ал Джигитовканы ат спортының осы түрімен айналысатын әуесқой жігіттер жігіттік өнер деп атап жүр. Сонымен бірге вальтижировка спортының жалғасы ретінде әлемдік спорт саласына енген қиын өнер саналатын Джигитовка соғыс жылдарынан қалған деген де нұсқау бар.

Соғыс кезінде ат үстінде әртүрлі іс-қимылдар жасалып, кейінірек сол қимылдар өңделіп, циркте көрсетілетін акробаттық әдіс-тәсілдерге ұласқан. Демек, ат спортының әскери-қолданбалы түріне жататын бұл өнер ат баптайындардың да қолынан келе бермейді. Ең бастысы, аса мұқияттық пен ептілікті талап ететін бұл өнерде аса қатты жылдамдықпен шауып келе жатқан аттың үстіне секіріп мініп, секіріп түсіп, атты айналып, тіпті бір жағынан екінші жағына ауысу, төбесінде тұрып, жатып шабу сынды күрделі жаттығулар көрсетілді. «Бізге ат жақсылап, әдемі шауып берсе болды. Қалған үстіндегі жұмыстар өзіміздікі», дейді Шымкент циркінде Джигитовка көрсететін «Тұмар» командасының жігіттері.

Быттыр Астана қаласында өткен «Азия жаңғырығы» фестивалінде жылқылардың қатысуымен өнер көрсеткен Шымкент цирктін «Джигитовка» қойылымы 13 мемлекеттің цирк өнерпаздары әзірлеген бағдарламалар арасынан алтын жүлдені иеленіп қайтқан. Ат үстіндегі түрлі тәсілдерді мүдірмей орындап, қазылардың ерекше ілтипатына ие болған шабандоздардың арасында 5 ұл 2 қыз бар. Олар Азамат Жолдас, Азамат Ерман, Бекбол Камалов, Абдуғали Абдразақ, Бақдаулет Тастанбек және жетекшісі Ерейіт

Камалов. Сонымен бірге қазақтың екі аруы Бибі Үмбетова мен ат құлағында ойнаған суретімен әлемді тамсандырған Балнұр Садық бар.

Біз Джигитовканы еркін меңгерген, ат құлағында ойнайтын бабы келіскен батыл шабандоз жігіттермен сөйлесіп қайттық.

ҚАЗАҚТЫҢ ЖЫЛҚЫСЫ АСАУ БОЛАДЫ

Азамат Жолдас цирктегі атпен өнер көрсету ойындары құрылғаннан бері жұмыс істеп келе жатқан 26 жастағы жігіт. 11 жылдан бері екінші үйі саналатын цирктегі әрбір атты жанындай жақсы көреді. Жылқыларына Черниш, Гиган, Акбура, Актануа, Талисман, Буден деп ат қойған.

«Атқа қызығу дегенді алдымен сезініп көру керек. Бұл ерекше құмарлыққа жатады. Циркте дененді онай жарақаттап та алуға болады. Қанша мәрте денемізді майып етіп алсақ та қызығушылығымыз арпаса кеміген емес», — дейді мұның алдында иппадромда жұмыс істеген Азамат.

Ол 5 сыныптан бері аттан түспепті. Сол кезден бері Шымкент қаласындағы атшабарда қыз қуу, тенге ілу сынды жарыстарға қатысқан. Кейін циркке жолы түсіп осындағы аттарды үйретіпті. «Келешекте өзінді басқа салада сынап

көре аласың ба?» деген сұрағамызға: «Жоқ, қандай жағдай болмасын болашағымды тек жылқымен байланыстырамын. Басқа жұмыс істесем де жылқы шаруашылығын қоса алып жүруім мүмкін. Бұл іске бар ынта-ықыласымды қойғанмын. Алла Тағаланың өзі: «Істеген жұмыстарыңнан ләззат алыңдар, сол арқылы ризықтарыңды арттырамын» дейді. Жалпы менің білуімше осы бағытты таңдаған адам шыға алмайды екен», — деп жауап берді ол.

Бақдаулет Тастанбек пен Азамат Ерман командаға 2 жыл бұрын қосылды. Екеуі де М. Әуезов атындағы университеттің «Театр және өнер» факультетінің түлегі. Бастапқыда оншақты жігіт болып келген олардың арасында барлық қиындыққа шыдап қалған осы екеуі ғана. «Жуырда дипломымызды аламыз, жұмысты осында жалғастырамыз деп отырмыз. Бірге келген жігіттердің көбісі шыдай алмай кетіп қалды. Ат үстіндегі әдіс-тәсілдердің қиындығынан бөлек, денені жаралау жағдайлары жиі болады. Мұнда жалақы үшін емес, осы саланы барынша сүйетіндер, қанша қиыншылық көрсе де мойымайтындар іріктеліп қалады екен», — дейді Бақдаулет бізбен әңгімесінде.

— Кез-келген тіршілік иесін алдау, мақтау ұнайды. Біз аттарды үйретерде, бір нәрсені дұрыс істесе басынан сипап сәбіз, қант береміз. Сонда оның миында «Мен осы нәрсені дұрыс істеген екен»



ЖЫЛҚЫ ЖАЛЫНА ЖАРМАСЫП ӨСКЕН

“

Быттыр Астана қаласында өткен «Азия жаңғырығы» фестивалінде жылқылардың қатысуымен өнер көрсеткен Шымкент цирктін «Джигитовка» қойылымы 13 мемлекеттің цирк өнерпаздары әзірлеген бағдарламалар арасынан алтын жүлдені иеленіп қайтқан.

тәсілдердің сәтті шығуы спортшы мен атқа байланысты. Ат пен шабандоздың байланысы мықты болуы тиіс. Күн сайын 2-3 сағаттық дайындық жүргіземіз. Олардың денесін әр күні қыздырып, бабына келтіріп отыру керек. Біздің көп уақытымыз да дайындыққа кетеді. Жылына 2-3 рет қыста-жаз мезгілінде демалдырып алатынымыз бар. Есік алдындағы арнайы қоршаудағы құмға шығарып аунатамыз. Ол жерде секіріп ойнайды. 3 мезгіл ережемен тамақтанады», — дейді Азамат тағы бірде.

БАЛАДАЙ БАПТАЙДЫ

Жылқы да ауырып, мазасызданып қалатын кездері болады. Көктем, күз мезгілінде инъекция арқылы дәрумендер салынып тұрады екен. Әсіресе, көктемде өзге жануарлар көк шөпке шыққанда мұндағылар да соны аңсама керек, қураған шөпке қарағысы келмейді. Ал ат баптаушылар көк шөпте ауру болуы мүмкіндігі болғандықтан дәрумен егеді. Цирктегі қазанаттар неғұрлым күшті, қуатты болса олардың шабысы да жақсы болады. Сондықтан олардың ішіп-жеміне ерекше назар аударылады.

Күн сайын жаттығу жүргізілгенімен мұндағылар жиі қойылымға шыға бермейді. Басшылық бекіткен кестеге сай мереке күндері ойын көрсетеді. Ал ауыл-аймаққа шығатын Шапитода Джигитовка көрсетіле қоймайды. Себебі манеждің ұзындығы 13 метрден кем болмауы тиіс. Жуырда еліміздегі ең жас цирк саналатын Шымкент цирк ұжымы Алматы циркінде 15 күнге жуық гастрольде болып қайтыпты.

«Алматыда көрермендер көп жиналып аншлаг болды. Көрермендер ризашылықтарын білдіріп жатты. Өкінішке қарай, мұндағылар әлі циркке үйрене алмай жатыр. Цирк өнерін

бағалай бермейді. Біз сыртқа шығып келсек шабыт алып, қуанып келеміз. Бір жылдары Қытай мемлекетіндегі бірнеше қаламен келісімшарттарға отырып, жиі барып жүрдік. Онда цирк дегеніміз көдімгідей бизнес. Тіпті, ірі компаниялар өздерінің жарнамасын цирк арқылы шығарады. Халық қатты қызығады. Кез-келген қойылымда ине шаншар жер болмайды. Тағы айта кетер жайт, онда ат өнерін көрсетусіз цирк болмайды. Ма-шу өнеріне ерекше ілтипат көрсетеді. (Ма-ат, шу-шоу деген мағына береді). Сондықтан олар үнемі келісімшарт арқылы өзге мемлекеттермен ат үстінде ойнайтын жігіттерді алдыртады. Қытайлықтар атқа мінуге қорқады. Біз ол жаққа үйретілген атымызды алып бармаймыз. Сонда үйретілгендері болады, егер жоқ болса 1 ай бұрын барамыз», — дейді Азамат Жолдас.

Дәл қазір Шымкент цирк ұжымы балалардың жазғы демалысына арнайы қойылымдар ұйымдастырып жатыр. «Бізді мұнда байлап тұрған ат. Күн сайын жаттығуға келеміз, жылқыларды дайындап сүртіп жуындырамыз. Олармен сөйлесеміз», — дейді жігіттер. Команда мүшелері бірін-бірі алмастыра алатындай барлық әдіс-тәсілді меңгерген. Джигитовка өнері арқылы түрлі әдіс-тәсілдердің техникасын ұйымдастырады. Оған қыздар да белсене қатысады. Жоғарыда айтып өткеніміздей, Балнұрдың қазақтың ұлттық киімімен ат үстінде ойнаған фотосы шартарапқа тараған болатын. Әкесі мен анасы да атшабарда жұмыс істегендіктен, жастайынан сәйгүлікке қызығып өскен қыз қазір ат үстінде талай техникаларды мүдірмей орындайды. Ол «Бәрі техникаға байланысты. Сонымен қатар физикалық та дайындық керек. Тәсілдерді бір шығарып алған соң қиын емес», — дейді ол. Балнұр да болашағын атпен байланыстырады. Ат ұстайтын ферма құрғысы келеді. Ал белгілі фотограф Тұрар Қазанған өзінің әлеуметтік желісінде аттың жалында ойнайтын Балнұрдың суреті көптеген фото көрмеге қойылғанын, оның ішінде Франция, Қытай, АҚШ, Жапония елдерінде көрерменнің ықыласына бөленгенін айтады. «Аттың үстіндегі қызды қарашы, қазақтың қыздары сұлу екен» деп тамсаныпты көрермендер.

Біздің сол Балнұр бүгінде Джигитовка ойынының көрігін қыздырып жүр. Кез-келген қазақтың дөлекесін қоздырып, рухын оятатын бұл өнерді де қолынан келген адам ғана орындай алса керек.

Назгул НАЗАРБЕК,
Шымкент қаласы



